

Bez saradnje nema razvoja regije

Sa Foruma na Jahorini poručeno je kako se region mora okrenuti budućnosti i sam rješavati svoje probleme

Cijeli region suočava se sa istim izazovima i upravo zbog toga regionalna saradnja centralna je tema ovogodišnjeg, trećeg Jahorina ekonomskog foruma, koji je jučer počeo.

Budućnost

Kako je kazao Saša Grabovac, predsjednik Organizacionog odbora, nedovoljno razvijena infrastruktura, visoka stopa nezaposlenosti i odlazak mladih ljudi u inostranstvo samo su neki od problema sa kojima se suočavamo.

- Moramo raditi više i bolje i ne čekati da neko drugi riješi naše probleme. Zbog toga je ključno održavanje dijaloga između vlada, naveo je Grabovac, te istakao nadu da će 17 različitih sesija dovesti do zaključaka koji će doprinijeti da budućnost bude bolja.

Teme Foruma su regionalni infrastrukturni projekti, radna snaga kao resurs koji nestaje, uklanjanje nekarinskih barijera...

Predsjednik Republike Srpske Milorad Dodik, koji je i pokrovitelj Foruma, kazao je da ukoliko se obezbijedi razvoj svih zemalja zajedno, onda će se i ekonomije zemalja regiona kretati uzlaznom putanjom.



Budućnost je vezana za ekonomiju, kaže Dodik / DAMIR ČUMUROVIĆ

- Regionalni razvoj predstavlja sine qua non svih naših odnosa i ukoliko svi zajedno ne obezbijedimo da se jednako krećemo i razvijamo, ni naše ekonomije se neće kretati uzlaznim putanjama, kazao je Dodik, te dodao da čitav region treba prestati biti prostor gdje se mladi ljudi obrazuju, za šta države ulažu mnogo novca, a onda odlaze i doprinose negdje drugo.

Burne godine

Budućnost je, kaže Dodik, vezana za ekonomiju, a jedan od planova Vlade RS-a u budućnosti je da uvede novo ministarstvo - ministarstvo za nove tehnologije jer smatraju da moraju više raditi na informatičkoj sigurnosti i ulaganju u ovu oblast.

Premijerka Srbije Ana Brnabić također je istakla kako se region

suočava sa brojnim izazovima, ali kako, bez obzira na to, on pokazuje stabilnost.

- Iza nas su burne godine i nadam se da smo to zaista ostavili iza sebe, jerto ne možemo promijeniti, ali možemo uticati na ono što će se dešavati u budućnosti. Naša budućnost je evropska perspektiva, a proces evropskih integracija nije brz niti lak, to je put neophodnih i teških reformi i zatajput ne treba da postoji prečica. Kada je u pitanju regionalna saradnja, mora postojati volja svih strana da se ona intenzivira, trebamo učiti jedni od drugih, poručila je Brnabić.

Član Predsjedništva BiH Dragan Čović rekao je da se jedino povećanjem investicija može doprinijeti smanjenju odlaska mladih u inostranstvo. Istakao je Čović i kako je EU naša budućnost. **MINELA PAMUK**